

17. nov 2016

Meeqqat atuarfianni angajulliit atuartinneqarnerini MMS imaluunniit nittartakkakut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqqunneqarnissaannut aalajangiiffigisassatut siunnersuut.

(Inatsisartunut ilaasortaq Tillie Martinussen, Demokraatit)

Siumumiit siunnersuuteqartoq qutsavigalugu ima oqaaseqassaagut.

Oqaaseqannginninni Kalaallisut taasissutissartaata qallunaatullu nutserneqarnerata imminnut naapertuutinninneri ilisimatitsissutigissavara.

Oqaatsivulli pisortatigut oqaasiummata taakkulu malinneqartussaammata kalaallisut oqaasertaliusseq aallaavigalugu oqaaseqassaanga.

Atoqatigiinneq pillugu meerartatsinnik ammanerusumik oqalliseqarsinnaaneq inuiaqatigiinni tamatta inooqataasugut pisussaaffigaarput. Nassuerutissaavoq inuiaqatigiinni ajornartorsiutivut suli annertuallaarujussuarmata. Nassuerutissaavoq meeqqat kinguaassiutitigut atornerlunneqartarnerat amiilaarnartoq akuersarneqarsinnaanngilluinnartorlu piummat qaffasippallaarujussuarmallu, tassumalu nungutilluinnarneqarnissaannut inuiaqatigiit susassaqaarfiillu tamarmik suleqatigiittariaqarmata.

Nassuerutissaavoq naartuersittarneq inuiaqatigiinnut aningaasarpassuarnik nammakkersuutaasoq atugaammat qaffasippallaarujussuarmallu.

Nassuerutissaavoq kinguaassiutitigut nappaatipalaat inuunerup sinneranut kingunerluuteqarsinnaasut atugaavallaarujussuarmata. Ajornartorsiuteqarnitta qanoq ersarinnerpaamik sunniuteqarnerpaamillu anigornissaannut peqatigiittariaqarpugut.

Meeraq tamatigut inersimasuunerup silarsuaanut appakaakkiartortoq illersugassaavoq, tamannalu tamatta pisussaaffigaarput.

Taamaammat qulequtaq pineqartoq susassaqartut qulaatiinnarlugit ingerlatinneqaqqunagu ataatsimiitsitaliamut ingerlateqqinneqarnissaa innersuussutigaarput, tassani susassaqartut tamaasa peqatigalugit qanoq pitsannerpaamik alloriarloqartariaqarnera meeqqallu atuarfiata qanoq periuseqarluni qulequttamik kivitseqataanissaa suleqatigiiffiussammat.

Meerartavut inuusuttavullu nittartakkatigut peqatigeeriaasiat uagut nalitsinnit allaanerulluinnarpoq, ilaatigut angajoqqaatut sutigut eqqummaariffeqartariaqarneq nalornititsisarlu. Nittartakkatigut

paquminartunut killissamillu qaangiisunut taassumallu iluani mianersorfissat inatsisitigullu illersugaaneq pillugu atuarfeqarfinnit sunnuteqarnerpaamik ilusilersuinissamik peqataassaagut, qulequttallu ataatsimiitsitaliami susassaqtunik peqateqarluni suliarineqarnissaani qilanaarpugut.

Taamak Siumumiit siunnersuuteqartumut qujalluta suleqatigiinnissamut tikilluaqqusivugut.

Vivian Motzfeldt

Siumut